

**VON DEN ZEHEN  
TEUFELN ODER  
LASTERN, DAMIT DIE  
BÖSEN UNARTIGEN  
WEIBER BEFESTEN...**


---

Nicolaus Schmidt





6134-B.



**Sonden sehen Teu-**  
**fel**n oder Lastern/ damit die bösen vn-  
 artigen Weiber besessen sind / Auch von zehen  
 Tugenden / damit die frommen vnnnd ver-  
 nünfftigen Weiber gezieret vnnnd bes-  
 gabet sind / in Keimweis ge-  
 stelt / Durch Nicolaus  
 Schmidt.

**Ihesus Syrach am xxv. Cap.**

Es ist kein Kopff so listig als der Schlangen  
 Kopff / vnd ist kein zorn so bitter / als der frawen  
 zorn / Ich wolt lieber bey Lewen vnd Trachen  
 wonen / denn bey einem bösen Weib / etc.

**Vnd am xxvj. Cap.**

Ein tugentsam Weib / ist ein edel gabe / vnd  
 wird dem gegeben / der Gott fürchtet / er sey  
 reich oder arm / so ist es im ein Trost / vnd macht  
 in allzeit frölich.

**M. D. LVII.**



**E**ist aus Gottes wort krefftig zu Gen. 1. 2.  
erweisen / das der Ehestand von Gott ge-  
stiftet vnd angerichtet ist / das Man vnd  
Weib freundlich vnd friedlich bey einander wo-  
nen / vnd Kinder zeugen / dieselbigen in Gottes  
erkenntnis / Gott zu ehren / vnd der Welt zu nutz  
auffziehen sollē / das auch das Weib dem Man Ephes. 5  
gehorsam sey / in für jr haupt vñ herrn erkenne  
vnd halte / der Man auch widerumb das Weib  
liebe vnd versorge / wie sich selbst.

Solchs ist dem Teuffel / als einem verstor-  
er aller Göttlichen werck / ein vnleidlicher handel /  
wehret vnd hindert derhalben wo er kan / das  
ja solche Göttliche stiftung vnd anrichtung ih-  
ren fortgang nicht behalte / wie sie anfenglich  
von Gott ist angerichtet worden / treibet der-  
wegen mit gantzer macht alle die mittel / so im  
zu solcher verstörung dienstlich sind / auff das  
die Eheleut sich nicht recht in irer ordnung hal-  
ten / vnd auch nichts guts aus dem Ehestandt  
herkomme.

Wenn nu die Eheleut ires beruffs nicht fleis-  
sig warnemen / auch Gottes wort / dadurch sie  
zusamen gebunden / vnd eines dem andern ge-  
schencket ist / aus dem hertzen vergessen vnd fa-  
ren lassen / So hat als denn der Teuffel ein star-  
cken zutritt / allerley vnrat in dieser Göttlichen  
ordnung anzurichten / er blendet bald ire her-  
tzen / das keins das ander also ansehen kan / wie



es im von Gott ist vorgestellt / der Man gedenc-  
cket andere Weiber sind / gleich wie sein Weib /  
das Weib gedenccket / ihr Man sey wie andere  
Menner / von allen gliedern / wie ein ander Man  
gestalt / Derhalben nichts mehr vnd besser zu  
halten sey / denn ein ander Man ( wil hie nicht  
sagen von der gemeinen schöpffung / da alle  
Mannesbild mennisch / vnd Weibsbilde Weib-  
bisch geschaffen sind ) sondern ich sage von Ehe-  
leuten / wenn ein Man sagen wolt / andere Wei-  
ber sind eben wie mein Weib / vnd ein Ehefrau  
sagen wolt / andere Menner weren auch gleich  
wie jr Man / da ist es sehr weit gefehlet / denn ei-  
nem Eheman sollen andere Weiber / seinem  
Weibe so vngleich sein / so vngleich er selbst ei-  
nem Weibe ist / also auch einem Eheweib sollen  
andere Menner irem Man so vngleich sein / so  
vngleich sie selbst einem Man ist / denn Gottes  
wort zieret dem Man sein Weib / vnd dem Weib  
iren Man / welcher schmuck an andern Men-  
nern vnd Weibern nicht zu finden ist.

Wo nun im Ehestande solche vngleichheit  
nicht erkandt vnd gehalten wird. So mag der  
Teuffel leicht an sie setzen / sie sind fertig / Got-  
tes vnd seines geschencks nichts sonderlichs zu  
achten / auch sein wort vnd befehl hindan zu se-  
tzen / vnd des Teuffels eingeben zu folgen / vnd  
mag das Weib leichte oder geringe vrsach ha-  
ben / dem Man iren gehorsam zu versagen / auch  
nicht für iren herren vnd haupt ( als dem sie zu  
gut /



gut/ vnd zum gehülffen erschaffen ) erkennen/  
So lest sich denn der Man auch gedüncken / er  
hab vrsach genug / seinem Weibe / die liebe / vnd  
andere nottürfftige versorgung vnd pflicht zu  
uersagen.

Wenn sie nun (vom Teuffel geblendet ) also  
daher leben / ist es nicht wunder / das sie ein elen  
des / aber doch Gottlos leben furen / keinen frie  
de / keine ruhe / keine ergetzlichkeit haben / denn  
alles was ander Eheleute erfrewet / das macht  
sie trawrig / darzu andere Eheleut lust haben /  
ist jnen ein vnlust / was andern die zeit kurtzet /  
das macht jnen zeit vnd weil lang / Summa  
aus einer solchen Ehe wird ein rechtes wehe /  
Derhalben auch oft Eheleut / solchen jamer /  
elend / vnd vnruhe zuuormeyden / vnd los dar  
von zu werden / von einander lauffen / ein ander  
vergeben / oder andern vnrat anrichten.

Vnd welchs das ergste ist / das keines sein  
Ampt bedencken / vn̄ dem andern weichen wil /  
das Weib gedencet / der Man ( ob sie gleich nit  
thut was sie sol ) müsse sich nach jr richten / vnd  
jren mutwilligen vngehorsam dulden / vnd ge  
schicht bisweilen also / das etliche lose Men  
nen vnnd Milchmeuler den Weibern ( wider  
Gottes befelh / vnd zu schand vnd schmach sei  
ner Göttlichen ordnung / da er sagt / er sol dein  
herr sein ) sich vntergeben / vnd des Weibes vn  
gehorsam selbst vrsachen.

Widerumb aber / welcher ein Man ist / vnnd

A iij getrawet

getrawet Mannes ampt zumerichten / vnd wil  
das Weib regieren / vnd zu schuldigen pflichten  
(die von Gott auffgeleget) halten / findet man  
wenig Weiber die da folge vnd dem Man nach  
Gottes wort sich vntergeben / sondern der meis-  
ste teil wird vom Sathan also geblendet / vnd  
verfüret / das sie nicht können noch wollen vn-  
terthan sein / sonder wollen aller ding selber re-  
gieren / wie denn der Satan mit dem armen vñ  
schwachen Weibs geschlecht (welchs von art  
vnd natur zur hoffart geneiget / vnd vbersich be-  
gert / auch one das blöde vnd schwache hertzen  
haben) durch diesen fall im Ehestand sehr viel  
jamer vnd vnrath anrichtet.

Wil aber auch alhie die Menner nicht ent-  
schuldigen / welche dem Teuffel auch bisweilen  
folgen / vnd sich sehr vbel in irem Ehestand hal-  
ten / irem beruff auch nicht trewlich nachge-  
hen / doch ist es nicht also gemein / als mit den  
Weibern / den der Satan hat es im anfang mit  
der Eva also abgespielet / das all ire Töchter ire  
Menner bereden sollen / einen biss zu gefallen  
vom Apffel thun / das ist / das der Man ir ge-  
horsam sey.

Wo denn ein Eheweib ires beruffs nit ach-  
tet / dem Teuffel ein mal oder zwey folget / So  
setzt der dieb vnd Mörder jmer je lenger je mehr  
an sie / bis er sie gantz vnd gar einnimpt / vnd  
von einem laster in das ander treibet / das sie  
sich letztlich nicht mehr heraus wickeln kan / vnd  
on als

on alle sehew / auch on alles erkentnus des vn-  
rechten / des Satan eingeben vnd iren lusten fol-  
get / das also kein vermanen / bitten / drehen /  
kein freundliche noch ernstliche straff hernach-  
mals hilfft / ja je mehr man ein solch (vom Sa-  
than eingenommen) Weib straffet / je erger sie  
werden / das sie auch frey vnd vnuerschämbt  
(wiewol zu irem mercklichen nachteil) heraus-  
faren / vñ iren Männern vnter augen sagen dörf-  
fen / schlagen sie einen Teuffel heraus / so faren  
ir zehen wider hinein / da ist zumal mühe vnd ar-  
beit / einem fromen Man / bey einem solchen be-  
teuffelten Weibe zu wohnen.

Dieweil aber solche Weiber (was für schand  
vnd schmach sie erstlich Gott im Himel / dar-  
nach irem Man / jnen selbst / vnd iren Kindern  
zu ziehen) nicht erkennen / habe ich dieselbigen  
zehen Teuffel mit iren lastern / wie sie in Gottes  
wort abgemahlet / in Reimweis hernach gese-  
tzt / das ein jedes Weib / so zucht vnd tugent lie-  
bet / sich darfür wisse zu hütten / vnd diser Teuf-  
fel keinem folge / Denn wo dieser einer einzeu-  
het / komen die andern auch mit.

Nach diesem hab ich auch / so viel möglich  
gewest / zehen Tugent der fromen Weiber / wie  
sie der heilig Geist in Gottes wort abgemalet /  
gesetzt / auff das ein jeglich Weib / so für Gott  
rhum / vñ für dWelt ein ehr vnd lob haben wil /  
sieh darnach zurichten lerne / Bitte der wegen  
alle frome / gotselige / ehrliebende weiber / dz sie



dieses schreiben / auff sie nit gerichtet / od damit  
verunehret / erkennen wollen / Sondern es gilt  
den bösen vnartigen / vngehorsamen Gottesle-  
sterinnen / ob dieselben aus dieser Schrift se-  
hen vnd lernen künden / was für ein greuel / vn-  
huld / vnd abschewlich / erschrecklich Bild sie  
vor Gott vnd aller Welt sind / vnd sich also nach  
Gottes wort vnd befelß gehorsamlich bessertē.

Solches ist meine meinung in diesem schrei-  
ben / das ich gern wolt / dz nicht allein die Wel-  
ber / sondern auch die Wenner auff iren beruff  
vnd befelß achtung hetten / vnd sich in dem selb-  
igen nach Gottes wort gehorsamlich hielten /  
so dürfften die Prediger auff der Cantzel /

die Regenten auff den Schlössern / nit so gar  
viel mit bösen vnartigen Leuten zu-  
sammen schaffen haben / zu Den xxiij tag  
Februarij im 1557. Jar.

Die

1557

Die zehen Teuffel/damit die  
bösen Weiber besessen sein.

Der **Gottlose**  
**Stolze**  
**Vngehorsame**  
**Zenckische**  
**Vnuerschampte**  
**Trunckene**  
**Hürische**  
**Mörderische**  
**Diebische**  
**Vnfreundliche** **Teuffel.**

**23** **Gottlos**

# Gottlose Teuffel.

In der heiligen Schrifft man liest  
 Das dieses ein böses Weib ist/  
 Die Gottes wort nicht hören mag  
 Vnd kompt darzu selten ein tag/  
 Vnd lebt on alle Gottes forcht  
 Seim Göttlichen wort nicht gehorcht/  
 Strebet darwider zu allen frist  
 Achet gar nicht/ was Gott gefellig ist/  
 Sie zeuhet nicht wol/ jr. Gesind  
 Nichts gutes lehret sie auch jre kind/  
 Sie gibet in ergerlich Exempel  
 Führet sie nicht zu Gottes Tempel/  
 Das sie Gott möchten reden hören  
 Der durch sein wort sie wil lehren/  
 Sie verachtet auch die gnaden zeichen  
 Lest jr kein Sacrament reichen/  
 Kein Gebet wird da gesprochen  
 Von jr/ durch aus die gantze wochen/  
 Befiehlt sich nicht in Gottes gnaden  
 Der sie bewart vor allem schaden/  
 Setzet sich freuentlich wider Gott  
 Wie der Gottlose Teuffel thut/  
 Welcher sie hat eingenomen  
 Lest sie zu kein guten gedanken kommen/  
 Was vnrecht ist/ mus jr gefallen  
 Ob sie es mit Leib vnd Seel mus zalen/

Noch



Noch ist sie also geblendet/  
Vom Gottlosen Teuffel geschendet/  
Das sie sich nicht kan bedencken  
Vnd zu Gott irem Herrn widerlencken/  
Vermanung ist an ir verlören  
Sie ist gleich wie ein pusch mit dorren/  
Wer dieselben wil greiffen an  
Viel stift in henden mus er han/  
So schmecht sie in/das ist sein lohn.

## Stolze Teuffel.

Wie der Teuffel im anfang thet  
Da er Gott verachtet het/  
Welches geschach aus vbermut  
Ein Gottlos Weib dermassen thut/  
Wenn sie Gott den Herrn veracht  
Seinem befehl stets wider getracht/  
Hat sie auch ein stoltzen mut  
Vnd lest niemand etwas sein gut/  
Niemand sol etwas für ir gelten  
Auff der gassen grüßt sie selten/  
Veracht all andere/wie sie sein  
Arm/reich/gros/oder klein/  
Vnd wil sich leuter nicht besinnen  
Das viel Sünd aus der hoffart rinnen/  
Vnd thut so fort dem Teuffel hoffieren  
Mit hoffart sich auch eusserlich zieren/  
Vnd füret also grossen Pracht  
Sicht sich vmb/hat eben acht/  
dmi

Wo eine tregt ein schön Rock an/  
Leufft sie heim/vnd sagets irem Man/  
Er sol jr auch ein solchen Kauffen/  
Oder sie woll kurtzlich von im lauffen/  
Kartecken zöpff/vnd dünne heublein/  
Purpuranisch mentel vnd kurtze scheublein/  
Welche die vom Adel tragen  
Auch von Golt gewirckte fragen/  
Zum Kleid begeret sie köstlich Tuch  
Darzu Bantoffel vnd Trepschuch/  
Das Dembd mus ausgehehet sein holl  
Vmb den hals vnd hendt der Löcher voll/  
Der Model vber einander geschrencken  
Viel Ketten thut sie an sich hencken/  
Die ein ist weis/die ander gehl.  
Ein glied ist lang/das ander sin behl/  
Ir haupt das thut sie also zieren  
Drey Borten tregt sie vber der stieren/  
Der ein von Perlein/der ander von Sammet  
Der dritt von Goldt herdurcher flammert/  
Die Hauben durch den Schleier schimmert  
Das alles vmb den Kopff her glimmert/  
Ein Kleid ist lang/das ander kurtz  
Geschlagen Silber mus sein jr Schurtz/  
Auff der Gassen thut sie her wätzen vnd wetzen  
Sie weis nicht/wie sie die Fufs sol setzen/  
Das Daer/welchs jr hat geschaffen Gott  
Das helt sie gar für einen Spott/  
Ein frembdes Daer zu den zopffen  
Mus sie haben auff dem kopffe/  
Vmb

Vmb ein Taler ist's jr nicht zu hoch  
 Man wirfft's zu letzt ins heimlich gemoch  
 Das Angesicht/welchs jr Gott geschaffen  
 Wil sie auch viel besser machen/  
 Mit farben thut sie es streichen an  
 Von weis vnd rot/das sol schön stan/  
 Schendet also frue vnd spat  
 Was Gottes Weisheit geschaffen hat/  
 Vnd thut nach solcher hoffart streben  
 Ob es gleich dem Man nicht ist eben/  
 Vnd wil andern Leuten allen  
 Zum verderben/jr/vnd jres Manns gefallen/  
 Vnd was für hoffart sie kan erdencken  
 Thut sie an den hals hencken/  
 Darbey man kan abnemen vnd spüren  
 Wie die hoffart sie thut füren.

### III.

## Ungehorsame Teuffel.

Ungehorsam ist das nechst  
 Welchs aus der schendlichen hoffart wechset/  
 Wie es sich denn thet beweisen  
 Mit der Eua im Paradeise/  
 Welche verachtet jren Schöpffer  
 Der da ist vnser aller Töpffer/  
 Welcher gemacht hat vns allen  
 Nach seinem Göttlichen gefallen/  
 Doch wolt das Weib höher steigen  
 Brach Obs von des Baumes zweigen/

Vnd wolt also aus vbermut  
 Gleich sein dem aller höchsten gut/  
 Verachtet also sein Göttlich Wort  
 Solchs treibet der Teuffel jimmer fort/  
 Das man Gottes befel aus den augen  
 Setzen sol/vnd gar verlaugen/  
 Wenn ein Weib mit hoffart ist beladen  
 Kan sie sich auch für andern schaden/  
 Nicht hüten/oder bewaren  
 Thut von einer Sünd zur andern faren/  
 Die weil sie vnghehorsam gegen Gott nicht acht  
 Beweist sies gegen jren Man mit macht/  
 Sie meint/der Man mus sich schmiegen  
 Seinen willen nach dem jren biegen/  
 Vnd leß sich darzu nicht regieren  
 Man thue sie denn mit Knütteln schmieren/  
 Vnd thut also bey jrem leben  
 Jrem Man gar nichts nachgeben/  
 Sie merckt auch nicht auff seinen mut  
 Ob jm etwas misfallen thut/  
 Das sie dasselbig thet meiden  
 Sie meint/der Man mus es wol leiden/  
 Das also der Man an jr  
 Nichts denn widerwillen spür/  
 Wil denn nach seinem Ampt der Man  
 Gehorsam von seiner Frawen han/  
 Zeiget jr an/vnd wie es dort  
 Geschrieben stehe in Gottes wort/  
 Das sie sich lassen sol regieren  
 Des Mannes willn setzen für den jren/  
 Thut

Gene. 3.  
 Ephe. 5.



Thut sie sich mit macht dawider sperren  
Wil weder von Gott noch vom Manne lehren/  
Vnd ist also vnghehorsam  
Inn allen dingen irem Man/  
Thut sich freuentlich wider in setzen  
Mit zancck thut sie der Teuffel hetzen/  
Der folgt darauff gar bald vnd kurtz  
Wie eine frucht aus böser wurtz/  
Denn miteinander thun sie wandern  
Keiner bleibet on den andern.

### III.

## Zancck Teuffel.

Zancck vnd hader ist nicht weit  
Wo hoffart vnd vnghehorsam zur herberg leit/  
Denn bey einander sind sie gern  
Vnghehorsam kan des zanccks nicht entpern/  
Damit er sich vormeint zu schützen  
Vnd wil also die Warheit trötzen/  
Will nicht vnghehorsam sein gewesen/  
Wie wir denn in der Schrift lesen/  
Wenn nu ein Weib also besessen  
Ires schuldigen gehorsams thut vergessen/  
Vnd wird von irem Man erinnert  
Wie sie gehorsam hab von jr gesündert/  
Da hebt sich ein plerren vnd grisgrammen  
Thut den Man anplecken vnd zannen/  
Sie zancckt vnd beißt mit irem maul  
Wers hören sol/ dem thut es faul/

Gene. 3.

B liij Vnd

Vnd gehet/wie der weise Man  
 In sein Buch hat gezeiget an/  
 prou.19. Das Löwen vnd Beren grimmig  
 Syrach Sind nicht so gantz vnd gar vngestimmig/  
 26.25. Als ein solch zornig vnd zencfisch Weib  
 Die mit irem eignen Leib/  
 Iren Man also thut plagen  
 Mancher scheint sich/vnd darffs nicht klagen  
 Ein weites haus wird im zu eng  
 Vber zwerch/vnd nach der leng/  
 Sagt er etwan ein krummes wort  
 Desslichers lebens man nie erhört/  
 Syrach Sie vorstellt all ihre geberden  
 26. Als ob sie zu einem sack wolt werden/  
 Sie schreiet vnd tobet greslich  
 Vber Beren vnd Trachen heulich/  
 Sie kan nicht leiden vngemach  
 Vnd greiffet bald zu eigener rach/  
 Kein fried ist da zu suchen  
 Sie kan nichts denn zanken vnd fluchen/  
 Vnnütz gewesen/vergeblich wort  
 Werden am meisten von ir gehört/  
 Alles was sie nur erfährt  
 Ist auff das aller ergste gekert/  
 Wil sich etwa ir Man ergetzen  
 Thut inschimpff mit einer andern schwetzen/  
 Zuhand hebet sie ein geschelt an  
 Kompstu heini/du loser huren Man/  
 Vnd füret solche liebliche wort  
 Die man kaum von ein Landtsknecht hört/  
 Das



Das oft mancher frommer Man  
So er anders wil Frieden han/  
Mit einer solchen mus die Stuben keren  
Welchs er viel lieber wolt entperen/  
Ist aber das Haus also gethan  
Das man auch gesind mus han/  
Da gehet recht das zencckisch spiel  
Vnd treibt es vber die massen viel/  
Weist die Magd eine hur/oder einen balck  
Den Knecht ein schelm oder schalck/  
Die Magd sey faul oder diebisch  
Der Knecht vorwegen/oder bübisch/  
Solchs hebt sie am morgen an  
Vnd weret/bis man wil schlaffen gan/  
Kein gut wort geht aus irem munde  
Entweder krankheit/marter/oder wunde/  
Vnd wenn das Gsind zu Tisch sol sitzen  
So spricht sie jnen das Beneditzen/  
Vnd keiffelts in also ins maul  
Zum fressen gut/zur arbeit faul/  
Vnd günnet in keinen bissen  
Den sie mit ruhe sollen genieffen/  
Ob sie ins fürgesetzt do  
So schmeckts in gleich wie Dabersto/  
Sie ist also gantz vnd gar besessen  
Vom Sackteuffel vngemessen/  
Der vnuereschampfte Teuffel folget im nach  
Denn sie ziehen beide an einem Joch.

# Vnuorschampte Teuffel.

Wo ein Weib so Gottlos bleibt  
 Stoltz vnd vngehorsam treibet/  
 Auch zeneckisch bleibt zu aller frist  
 Letzlich sich nimmer schämt / das wißt/  
 Es sey ein Laster klein oder gros  
 Kan sie halten weder ziel noch mos/  
 Gantz vnuorschämt geht sie hinan  
 Kein vnterscheid sie haben kan/  
 Thut allweg ehe böses / denn gut  
 Das macht / sie hat kein schamhut/  
 Der Teuffel hat sie darumb betrogen  
 Den vnuorschampten eingelogen/  
 Das sie nun gantz los vnd frey  
 Treibt schand vnd laster one schew/  
 Derhalben ist sie gantz ruhmorisch  
 Gegen Kind vnd Gesind stuhrmisch/  
 Gar nichts kan sie vortragen  
 Sie flucht oder thut mit feusten drein schlagen  
 Auch ist sie aller vnart vol  
 Lim grauset / der es hören sol/  
 Sie verstehet kein schaden noch frommen  
 Kan in derhalben nicht vorkommen/  
 Ob gleich on gefehr was ist geschehen  
 Kan sie gar nichts vbersehen/  
 Vnnütz geschwetz / vergeblich wort  
 Werden am meisten von ihr gehort/  
 Redt man ihr ein / so thut sie glotzen  
 Mit bösen Worten hefftig trotzen/

Stelt sich/als hab sie jr zehen erschlagen  
Ich glaub/sie solt den Teuffel jagen/  
Noch mus jr alles wol stehen an  
Wie ein Esel/der wil auff holtzschuch gan/  
Mit wort vnd wercken vnbestendig  
Wird bald gemacht abwendig/  
Hat darzu kein steten sinn  
Da bringt sie vnuerschambte bosheit hin/  
Sie achtet nicht/was sey ehrlich  
Vor Gott vnd der Welt redlich/  
Vnd was andern ist vnrrühmblich  
Meint sie/es sey ihr thünlich/  
Ehr vnd zucht thut sie sich enthalten  
In schand vnd Laster wil sie alten/  
Auch wenn sie heimlich ding thut hören  
Welchs niemand sol erfahren/  
Auch niemand sol nachsagen  
Dasselbige thut sie austragen/  
Ist verschwiegen in keinen dingen  
Ob es gleich grossen schaden thut bringen/  
In des/so leit es in jrem Haus  
Als hett man die Sew erst getrieben aus/  
Da ist's zurissen vnd zuhaddert  
Ein Kind nach dem andern herfladdert/  
Eins besudelt / das ander beschiesse  
Das dritt halb nacktet/das vierdt zurissen/  
Vnd sehen vmb den kopff so rauch  
Gleich als weren hauff schauch/  
In der kammern die federn fliegen  
Vnd lest die Bett zurissen liegen/

Sie sagt/sie mag nicht flicken  
 Weder wircken/nehen/oder sticken/  
 Vnd ob sie Flachs an rocken legt  
 In acht tagen sie in Kaum ein mal anregt/  
 Der Rocken ligt vnter Bencken vnd Tischen  
 Den Flachs nimpt sie denn zu Arschwischen/  
 So hat sie den abge spinnen  
 Vnd gehet spatzieren an der Sonnen/  
 Das macht der Teuffel vnuorschampt  
 Der hat sie nach sein willen gezampt/  
 Das sie verdrossen sey vnd fürwitzig  
 Desgleichen zu andern Lastern hitzig/  
 Ein ander Teuffel nacher zuecht  
 Vom vnuerschampten gantz vñ gar nit fleucht/  
 Der Sauffteuffel ist er genant  
 Den vnuerschembten Weibern wol bekandt/  
 Sehr lang ist er da vmbgerandt  
 Bis er ein solche herberg fandt.

## VI.

### Sauffteuffel.

Wenn ein Weib bleibt vnuerschemet  
 Auch keiner zucht noch ehren rechnet/  
 Die stiftet eitel vnfrommen  
 Kan zu keinen guten gedanken kommen  
 Was für Gott vnd Welt ist schendlich  
 Darein williget sie endlich/  
 Weil sie denn hat kein schand noch scham  
 Gibt sie nichts auff jren Man/

Vnd



Vnd treibet aus jm nur ein spot  
Sie acht auch wenig Gottes gebot/  
Da bringt sie hin des Teuffels list  
Der gantz in sie gefaren ist/  
Ein gellen hat er/man kent in wol  
Der macht die Leut truncken vnd vol/  
In sie ist er gefaren hinein  
Dat stettig durst nach Bier vnd Wein/  
Vnd hebet mit dem morgen an  
Mich wundert/wie sie thawern kan/  
Das sie also den gantzen tag  
Bis auff den abend sauffen mag/  
Das letze auff/das erste nidder  
Wens neune schlegt/so kompt sie widder/  
Vnd wartet auff den Sonnen schein  
Besorgt/sie sal die stiegen herein/  
Bald ist sie inn der Küchen  
Thut Suppen vnd Fleisch versüchen/  
Schickt mit eim krug bald nach dem Bier  
Liebe Magd/so dienestu mir/  
Vnd wenn es der Man würde schmecken  
Solstu den Krug im winckel verstecken/  
Vnd so der Man würd mercken das  
So setze in in das kerich fas/  
Vnd so der Man auch merckt die stedt  
So setz in hinauff vnter ewer Bett/  
Vnd so er fragt/wo bistu gewesen  
Sprich/ich hab feddern auffgelesen/  
Vnd so er nicht wil glauben das  
Sag du hast dem Vieh gehawen gras/

Fehrt er denn mit fragen fort  
 So gib jm gar kein gutes wort/  
 Sprich/er sol mich selber fragen  
 Als denn wil ich jm trucken zwagen/  
 Also bleibt sie selden nüchtern  
 Gibt böß Exempel Megd vnd Töchtern/  
 Vnd hat nicht lust zur messigkeit  
 Sondern nur zur trunckenheit/  
 Vnd schendet also jren Leib  
 Welchs nicht thut ein ehrlich Weib/  
 Macht jhr also ein bösen nam  
 Schendet sich/vnd jren eigen Man/  
 Dat sie dann wol gezecht vnd getruncken  
 So redet sie denn nach geduncken  
 Debet an zu kacken vnd zu kecken  
 Thut in der Stuben herumbher lecken/  
 Welt mit den Füßen ein gedümmel  
 Mit den Wenden auffn Tisch ein gerümpel/  
 Vnd schreiet/wie ein Bader Meid  
 So den Leuten wasser zutreit/  
 Wil niemand einer red gestehen  
 Ire sol alweg foran gehen/  
 Gar faul wird sie/vnd auch verdrossen  
 Derwegen höret gute bossen/  
 Wenn sie gehen sol ins Viehehaus  
 So sihet sie zum fenster aus/  
 Sie spricht/ der weg sey jr zu tieff  
 Ob gleich ein anders trucken vberhin lieff/  
 Denn trunckenheit hat in jhr  
 Geschendet jren schmuck vnd zier/



Jres Ampts hat sie vergessen gar  
 Darzu sie von Gott erschaffen war/  
 Der Wein ist hnein/die sinn sind heraus  
 Drumb hebt fort an vnkeuscheit haus/  
 Das haben die Römer wol errathen  
 Daben jren Weibern den Wein verboten/  
 Auch hat es Gott an manche ort  
 Verbieeten lassen durch sein wort/  
 Denn wie viel guts draus kommen kan  
 Zeigen Loth vnd Noah an/  
 Auch die Geschicht mit Holophernen  
 Wolt Gott/die Weiber tbetens lernen/  
 Tbeten trunckenheit nicht begeren  
 So blieb manche bey jren ehren.

Vale.  
 Max. lib.  
 2. de insti  
 tu. antiq.  
 Luc. 21.

Genes. 9.  
 19.  
 Judith  
 15. 16.

## VII:

### Vnkeusche Teuffel.

Wenn ein Weib stets lebt im saus  
 Vnd wartet jr auffss beste aus/  
 Von morgen an/bis in die nacht  
 So gewint das Feisch denn seine macht/  
 Vnd thut gleich wie der Wein im fas  
 Der alles/was im grunde was/  
 Vber sich treibt heraus zu spundt  
 Also auch/was in hertzens grundt/  
 Ist/eines trunckenen Weibe.  
 Das mag in jhr nicht bleiben/  
 Denn trunckenheit ist solcher art  
 Das sie vnzucht auch nicht spart/

Seneca.  
 ad Lucill.

Mit Worten vnd geberden  
Wil sie erfüllet werden/  
Wie es denn ein weiser Deid  
Zusammengesetzt hat alle beid/ .

Virgilius  
de vino  
& Vene-  
re.

Wenn Bacchus vnd Ceres regieren  
So wil Venus mit hoffieren/  
Denn wenn das Fleisch so wird gemest  
Mit fressen/sauffen auff das best/  
So kompt hernach nach seinen sitten  
Der grosse Durentussel geritten/  
Vnd sagt/sie sol nach irem willen  
Des fleisches lust büssen vnd stillen/  
Wo sie das nur bekommen kan  
Vnd nichts fragen nach irem Man/  
Vnd ob es schon der Herr vnd Gott

Sapient. 2.  
Tribus.  
Synri  
Beniam.  
Dauid:

In seinem Wort verbotten hat/  
Noch sol sie des Leibes irer Jugend  
Gebrauchen in lusten vnd vntugent/  
So lang/bis sie etwa alt wirdt  
Da ist's denn zeit/das man auffhört/

Sibaris  
Miletus  
Troia  
Roma  
Appianus  
Pausani-  
as

In des bleibt sie also besessen  
Thut Gottes ernster straff vergessen/  
Wie Gott zuuor gestraffet hat  
Die Welt/vnd manche schöne Stadt/  
Auch manchen Keiser vnd König schon  
Müssen hiespot/vnd dort ewig verdammis han  
Das alles kan sie nicht besinnen  
Thut in der Duren lieb verbrinnen/  
Weil sie nun irem Man/vnd Gott  
Alhie lebet zu schand vund spott/.

Tarqu.

So kompt ein ander Teuffel gerandt  
Wird in der Schrift der Mörder genandt/

### VIII.

#### Mordt Teuffel.

Vnkeuscheit/ Ehebruch/ vnnd vnzucht  
Werden inn Trunckenheit gesucht/  
Sonst wo man arbeit vnnd nüchtern ist  
Solcher Gedancken man wol vergift/  
Wenn aber vnkeuscheit ist entbrandt  
So wil sie haben ihren rhand/  
Vnd vor welchem sie sich schewen mus  
Den wünschet sie ein schwere bus/  
Vnd so viel an jr ist/ wolt sie gern  
Das sie alle schon begraben wehrn/  
Denn wo der Duren Teuffel wohnet  
Keines Menschen er verschonet/  
Also thut auch ein Weibesbildt  
Welche jrem Man die ehr abstilt/  
Da wündscht sie/ das der ewig Gott  
In bald wegnäm wol durch den Todt/  
Geschicht es nicht/ jhr ist nicht wol  
Das sie sich für jm schewen sol/  
Manche gibt gelt/ vnd das man jhn  
Mit giftt sol heimlich richten hin/  
Manche kan zu wegen tragen  
Das jr Man etwa wird erschlagen/  
Wie denn hienon der heilig Geist  
In der heilig Schrift ein Exempel weist/

D

Da

2. Sat  
muel. 11.

Da David gegen Urias Weibe  
Entbrandt war in seinem Leibe/  
Schickt er nach jr alda zuhandt  
Vnd treib mit jr vnkeusche schandt/  
Darnach hat er gar kurtzen rath  
Wie jr Man wurd gebracht zum tod/  
Er schreib Joab sein Hauptman dort  
Er solt in an ein fehrlich ort/  
Stellen im streit/ das er vmbkeme  
Vnd ihm der feindt das Leben nâme/  
Das ist des Duren Teuffels brauch  
Dergleichen Exempel weis ich auch/  
Inn einer Stadt gebawet schon  
Gehört zur Behemischen Kron/  
Ein Ehebrecherin da wonet  
Die hett ihr in Man gern gar abgelohnt/  
An ein Feierabendt wolt sie die sachen  
Mit irem Man gar aus machen/  
Ein gute laug hat sie gemacht  
Sein Haubt zu waschen auff die nacht/  
Wie sich der Man da nider pücket  
Die Fraw ein starcke Doltz art zucket/  
Dieb ihm in hals ein tieffe wundt  
Gott halff dem Man/das er auffstundt/  
Die Duer wol zu der Stadt auszhan  
Ihr lebenlang nicht wider kam/  
Ein anders/vnd wie es ist geschehen  
War ich dabey/vnnd habs gesehen/  
Das auff ein zeit ein frommer Man  
Ein junge Widfraw zum Weibe nam/

Vnd



Vnd da sie kam zu jm ins Haus  
Da lebt sie stettigs in dem saus/  
Mit sauffen vnd auch mit fressen  
Die was auch mit diesen Teuffeln besessen/  
Sie war Gottlos/stoltz/vnd zenckisch  
Vnnorschambt/truncken/hüirisch/vnd mörder  
Diebisch/vnfreundtlich vnd vngehorsan (risch  
In allen dingen gegen ihren Man/  
Im haus hat der Man ein Knecht  
Der was der Frawen lieb vnd gerecht/  
Nun wolt es sich nicht allweg fügen  
Das sie zeit zur vnzucht möchten kriegen/  
Denn der Man war stets im haus  
Den hettens lieber gewust daraus/  
Der Man ein wenig schuldig war  
Zu denen geht die Frawen dar/  
Vnd zeigt in an/wie das jr Man  
Werdt kurtzlich lauffen gar darvon/  
Derhalb sollen sie des gewissen reimen  
Vnd ihren Man lassen einnemen/  
Vnd meint also der Durenbalck  
Wie sie denn lehrt der Teuffel vnd schalck/  
Wenn der Man sitze im Dundeshaus  
Können sie der vnzucht mit fug warten aus/  
Im xxviij. Jar es sich zutrug  
Das der Man die Frawen schlug/  
Die Fraw die stiegen hinauff begert  
Da stund der Knecht mit blossen schwert/  
Vnd hieb alda den frommen Man  
Das ihm das Blut ybers Angesicht ran/  
D ij Der

Der Mann also in seinem grun  
 Wirfft den Knecht wol vnter ihn/  
 Dringet aus den henden jm sein schwert  
 Ihn mehr zu thun er nicht begert/  
 Des andern tages schicket er ihn  
 Sein Schwerdt vnd Kleider / lies jn ziehen hin  
 Der Knecht war nicht gar lange aus  
 Kam wider / zog in ein ander haus/  
 Das thet billich weh dem frommen Man  
 Gieng hin / vnd zeigets eim erbarn Rath an/  
 Der Rath den Knecht lies baldt einsetzen  
 Der Teuffel thet die Frawen hetzen/  
 Das sie Bier vnnnd guten Wein  
 Dem Vurer bracht ins Gefengnus hinein/  
 Vnd hatten da ein solchen rath  
 Er solt den Man schlagen zu todt/  
 Die Herren verbotten jm die Stadt  
 Die er bisher vormieden hat/  
 Solcher Exempel findt man mehr  
 Das mancher Man vmb gut vnd ehr/  
 Darzu auch vmb sein leben kommet  
 Wenn der Mordt Teuffel brummet.

## IX.

### Diebische Teuffel.

Wo wonet trunckenheit vnd hurerey  
 Da folget mordt vnd dieberey/  
 Der diebisch Teuffel sich nicht saumbt  
 Sein pferdt hat er gar bald gezaumbt/

Kompt



Kompt gerandt vnd thut anweisen  
Das ein Weib aller tück sich sol fleissen/  
Damit sie jr auswarten kan  
Ob gleich verdirbt jr eigen Man/  
Sie sol abtragen nach jrem gefallen  
Der Man mus wol anders zahlen/  
Vnd ob der handel ist wunderlich  
Sol sie lernen sündlerlich/  
Mit listen vnd mit tücken  
Das sie etwas mag entzücken/  
Ist der handel in einem frame  
So lawer sie auff die einname/  
Als denn mag sie so viel berechen  
Das sie etwas behelt zu zechen/  
Ist es denn mit Bier schencken  
Kan sie auch ein list erdencken/  
Vnd mag das Belt in Keller graben  
Kans finden/wenn sie es wil haben/  
Sie spricht/im fas sey gewesen  
Viel Dessen/drumb hab sie nicht kund lösen/  
Wie aus eim andern also viel Belt  
Drumb hab es jr so viel gefelht/  
Ist der handel am Gewandtschnidt  
Daleufft der Dieb weidlich mit/  
Schneidet sie zwölff ellen dauon  
Von achten sagt sie jrem Man/  
Das Belt vor die andern viere  
Gibt sie für Wein vnd Biere/  
Ist denn der handel mit stabel vnd eissen  
Dem Man thut sies die helfft kaum wissen/  
D iij Das

Das ander mus zu irem pracht  
Darauff sie lange zeit gedacht/  
Vnd legets also an ire hoffart  
Ihrem Durer sie auch mit spart/  
Dem thut es wol erspriessen  
Des gestolen Belts mus er geniessen/  
Sie kauft ihm hübsche Satzfenetlein  
Schöne Federn / vnd Spanisch Paretlein/  
Da ist das Belt wol angelegt  
Welchs sie irem Man diebisch abtregt/  
Ist der aber am Getreide  
So weis sie auch ihren bescheide/  
Ist es aber ein Handwercks Man  
So hat sie diebisch handtschuch an/  
Wenn sie auff den marckt thut lauffen  
Sol Brodt / Fleisch / Fisch / oder Eyer kaffen/  
So bringt sie kaum die helfft so viel  
Das ander Belt inn Diebsack wil/  
Ergreiffet sie denn des Mannes Taschen  
So stilt sie Belt volauff zu naschen/  
Da kauft sie Rosincken / Mandel vnd Zucker  
Das mus wol alles durch den schlucker/  
Zimetinden / vnd gutte Feigen  
Bis man auff die Kirschenbaum thut steigen/  
Der kan sie nicht essen genug  
Der Erdtber vol ein gantzen Krug/  
Darnach der Pflaumen vnd Spilling  
Opffel / Birn / vnd gutte Pfirsching/  
Als denn die Amorellen  
Bis man Welsche Nüs thut schelen/  
Dazu

Darzu auch viel Weintrauben  
 Kan sie künstlich abher klaben/  
 Gar heimlich in dem Kuchen bret  
 Ein grosser Topff mit genesche steht/  
 Der ist nicht lehr den gantzen tag  
 Sie laufft darüber wenn sie mag/  
 Zwey Schürtztuch vber einander sein  
 In einem ist ein sack nicht klein/  
 In diesem hat sie genesches viel  
 Sie nimpts herausscher/wenn sie wil/  
 Ein handel müst nicht sein gar schlecht/  
 Der solch nachgelt ertragen möcht/  
 Ist aber die narung mit Diehezucht  
 Da hat der Dieb erst ein gutte ausflucht/  
 Da stilt sie Fleisch/Brodt/Butter vnd Kess  
 Baldt den Dabern/ Korn vnd Weitz/  
 Summa/wer wolt so Flug sein  
 Der es alles kündt schreiben ein/  
 Was ein diebisch Weib kan abtragen  
 Vnd thut dennoch stettigs darzu klagen/  
 Wird es alles an so schendtlich  
 Zu yberflus vnd vnzucht endtlich/  
 Das machet alles das sie hat  
 Dem Teuffel geben raum, vnd stat.

# X.

## Unfreundlich Teuffel.

Wenn sich ein Fraw nicht thut bewaren  
 Vnd leßt die Teuffel in sich faren/

Also/das sie ist trewlos worden  
In ihrem Ehelichen orden/  
Vnd ist irem Man also feindt  
Das sie in nicht mit trewen meint/  
Vnd wil in bringen vmb Leibvnd Gut  
Die hat gewis ein solchen mut  
Das sie eusserlich in geberden  
Will dem Man vnfreundtlich werden/  
Von jr wird da kein gutes wort  
Den gantzen tag durchaus gehört/  
Ob gleich der Man jr redet zu  
Geht sie hinaus in stal zur Kuh/  
Thut nichts/den in nur trötzen  
In allem sich wider in setzen/  
Vnd was der Man nur haben wil  
Treibt sie stets das widerspiel/  
Will nichts denn zanken vnd murren  
Im haus hin vnd wider schnurren/  
Mit betten vnd mit essen  
Thut sie des Mannes oft vergessen/  
Mit im mag sie nicht schimpffen  
Treibt nichts denn vnglimpffen/  
Macht sich stets widersetzig  
Ist auch sonst vnbarhertzig/  
Kompt ein armes für das Haus  
So schreiet sie vnfreundtlich hnaus/  
Sie thut sich nicht erbarmen  
Vber die elenden vnd Armen/  
Ob sie gleich sind in höchster not  
Schilt sie ybel für ein stück Brodt/

Wolthat



Wolthat kan niemand von jr bekommen  
 Sie hab sein den dreifachen frommen/  
 Vnd sey auch ihres gleichen  
 Da lest sie volauff herschleichen/  
 Ihr Man aber mus gehen her  
 Nicht anders/ als er ein Köler wer/  
 Das Dembd/darein er ist gekrochen  
 Wird im Kaum gewaschen in vier wochen/  
 Das also der Man durchaus  
 Nichts anders hat in seinem Haus/  
 Denn solch Gottlos Teuffels gestift  
 Welchs seinem Leben ist ein giff/  
 Vnd wer ein solch Weib mus han  
 Der hat warlich ein rechten Scorpion/  
 Sie ist erger denn Lewen vnd Drachen  
 Thut dem Man sein leben sawer machen/  
 Sie ist ein eitter in seinen beinen  
 Bey Leuten mus er sich jr schemen/  
 Ein sandiger weg wol auff der Strassen  
 Macht in zu allen dingen verdrossen/  
 Vnd wie ein böses Dach thut triessen  
 Also kan sie nichts/den zanken vnd kiesen/  
 Ein solcher Man hat frölich zeit  
 Wie einer der gefangen leit/  
 Für das Leben nemt mancher den Todt  
 Das er nur kamaus dieser not/ etc.

Ihesus  
 Syr. 26.  
 Pron. 19  
 Syr. 26.  
 Pron. 12.  
 Syrach  
 26.25.26  
 Pron. 27

E Beschluß

## Beschlus.

Welcher lebet on Gottes forcht  
Vnd seinem wort auch nicht gehorcht/  
Lebet auch in freiem willen  
Nach seinem lust sich thut füllen/  
Vnd lebt im saus tag vnd auch nacht  
Auff nichts/denn nur vntugent tracht/  
Vnd achtet nicht auff erbarkeit  
Auch nicht auff zucht vnd redligkeit/  
Vnd verzeret also seine Jugent  
In schanden vnd vntugent/  
Wil sich auch nicht lassen machen zahm  
Vnd bleibet vngehorsam/  
Wil sich auch nicht lassen regieren  
Den wil Gott durch ein solch Weib registriren.

Bitte derwegen alle ehrliebende Menner vñ  
Weiber / wollet dieses schreiben dahin nicht  
deutē / das ich dz ehrlich Geschlecht der Weiber  
in genere / durchaus damit schmehe / denn ich  
wol weis / das ich Gottes geschöpff / welches  
alles gut vnd wol erschaffen ist / nicht allein nit  
verachten / viel weniger lestern oder schmehen /  
sondern mit danck annemen vñnd gebrauchen  
sol / Es sol aber den bösen vnartigen vnd vnge-  
horsamen Weibern / welche den Teuffel sich rei-  
ten vnd treiben lassen / die da weder Gott noch  
Welt schewen / weder schand noch ehr / weder  
sich noch iren Man vnd Kind bedencken / die  
sollen

sollen hieraus lernen / wo sie diesen erzeleten  
Teuffeln folgen / was für ein erschrecklich spe-  
etackel sie sind / für Gott vñnd allen Engeln im  
Dimel / des gleichen für allen ehrlichen Leuten  
auff Erden / Auch wie viel vnschuldiger hertzen  
vnter iren Kindern vñnd Gesind sie verwunden  
vñnd ergern / vñnd was für schwere rechenschafft  
sie Gott dafür geben müssen / vñnd das sie nicht  
allein alhie auff Erden / vñ von iren Mennern / wel-  
che solchen mutwillen vñnd vnzucht nicht alle lei-  
den können / sollen geschlagen / vñnd bisweilen  
gar gekrippelt werden / Sondern sollen auch  
mit denen Teuffeln / welchen sie folgen / ewig  
hellisch feuer / vñnd vñnaussprechliche pein lei-  
den / diese will ich nu / nicht allein nicht geschme-  
het / Sondern ire Gottlose hoffart / vñngehor-  
sam / zencckisch gemüt / vñnuorschambte geberde /  
Trunckenheit / Durerrey oder Ehebruch / mör-  
derisch hertz / dieberey vñnd vnfreundlichkeit / mit  
andern lastern angezeigt haben / auff das ande-  
re ehrliche vñnd frome Weiber sie meiden / bey in  
nicht wohnen / kein gemeinschafft mit in habē /  
ob sie schamrot würden / vñnd sich besserten.

Vñnd ob gleich etliche sein würden / so es für  
ein schmachschriff ansehen vñnd halten wolten /  
die birte ich / sie wollen doch gedennen / dz ichs  
nit erger gemacht / denn der heilig Geist in der  
Schriff / den ich hab allein vñ eusserliche gew-  
liche wercken vñ vnzüchtige geberde / die ich nit  
erticht / sond̄ gesehe vñ erfahren habe / geschrie

bē. Der heilig Geist aber hat sie nach irē hertze  
vnd innerlichen affecten / als der gewis weis/  
was im Menschen ist / beschrieben / der sagt / dz  
Schlangen / Scorpion / Drachen / Lewen / vnd  
Beren nicht so arg sein / es sey auch sicherer bey  
inwohnen / denn bey einem solchen beteußels  
ten / ybteußelten / vnnnd durchteußelten Weis  
be / Wie denn solchs in Sprüchen Salo  
monis / vnd im Ihesus Syrach in  
vorgemelten Sprüchen / vnnnd an  
andern örten mehr zu se  
hen ist / etc.

**Sehen**



# Zeihen Tugent der frommen Weiber.

Gottsfürchtig.

Demütig.

Gehorsam.

Friedlich.

Züchtig.

Nüchtern.

Keusch.

Gütig.

Getrew.

Freundelich.

E in

Gott

## Gottsfürchtig.

Luce 11.  
Deut: 6.

In der heiligen Schrift man list/  
 Das solches ein fromes Weib ist/  
 Welche von hertzen gern hört  
 Wo sie darzu kommen kan/ Gottes wort/  
 Redet vom selben mit irem Gesind  
 Vnd lerets auch darzu ire Kind/  
 Vnd lebet in rechter Gottes fürcht  
 Seinem Göttlichen wort gehorcht/  
 Thut auch darwider zu keiner frist  
 Bedenckt stets was Gott gefellig ist/  
 Gibt Kindern vnd Gesind gutte Exempel  
 Nimpt sie auch mit in Gottes Tempel/  
 Das sie da mögen hören  
 Von irem Gott/ der sie thut lehren/  
 Das sie in recht lernen erkennen  
 Darnach von hertzen Vater nennen/  
 Vnd lest ir oft die Sacrament reichen  
 Sagt Kind vnd Gesind von diesen Gnadenzei-  
 Vermanet sie mit gantzem fleis (chen/  
 Das sie auch halten solche weis/  
 Sich nicht setzen wider Gott  
 Sondern in anruffen in der not/  
 Vnd glauben seiner gnaden  
 So wird in gar nichts schaden/  
 Vnd hütten sich vor ybermut  
 Wie sie denn auch selber thut.

Demüt

## II:

## Demütig.

Ein Weib/vnd das Gottseligist  
 Inn demut sie sich helt/ das wist/  
 In irem hertzen/sinn vnd mut  
 Sie lautter nichts aus hoffart thut/  
 Dem Göttlichen wort nicht widertracht  
 Kein andern Menschen sie voracht/  
 Sie hat gantz demütige Sitten  
 Für wen sie geht/den grus anbetten/  
 Vnd wie jr hertz ist vol demut  
 Mit geberden sie nicht anders thut/  
 Ihr Kleider sind also gemacht  
 Das man dran spüren mag kein pracht/  
 Mit Silber/Goldt/vnd edelgestein  
 Treibet sie durchaus kein schein/  
 Sie denckt der Rock der sey jr gut  
 In welchem sie dem Wan gefallen thut/  
 Mit schmuck thut sie sich nicht beladen  
 Sie besorgt/es bring dem haus vnd jr ein schatz  
 Kartecken zöpff vnd gülden hauben (den/  
 Lange Mantel vnd kurtze schauben/  
 Achtet sie als schlechtes Tuch  
 Kein Pantoffel/ sonder Schuch/  
 Tregt sie an aus messigkeit  
 Vnd hüt sich für hoffertigkeit.

Matt. 10  
 Luc. 10.

1. pet. 5.

2. Tim. 2.

¶ III Gehor

# III.

## Gehorsam.

Wenn in ein Weib kein hoffart wohnet  
 Anderer Leut sie gern verschonet/  
 Thut kein andern Menschen schmehen  
 Durch demut kan sie sich ansehen/  
 Sie lest das richten vnd aussecken bleiben  
 Welchs die hoffertigen Leut treiben/  
 Darumb/ vnd das sie hat gehört  
 Das Gott saget in seinem wort/  
 Er wöll der hoffart widerstreben  
 Den demütigen aber gnad geben/  
 Weil sie sich thut für hoffart bewaren  
 Kommen andere Tugent mit gefaren/  
 Das sie sich helt gehorsam  
 In allen dingen gegen irem Man/  
 Lest sich denselbigen regieren  
 Setzt seinen willen für den iren/  
 Vnd folget fein sanct Peters rath  
 Der sie gar wol geleret hat/  
 Wie die from Sara Gott gethan  
 Gegen ihrem Man Abraham/  
 Den hies sie ihren Herren  
 Solchs thut sie hertzlich gern/  
 Vnd mercket auff des Mannes weis  
 Richt sich darnach mit grossen fleis/  
 Sie gedencet auch/ vnd das es Gott.  
 Also von jr gefordert hat/

Gene. 31

1. pet. 3.

Weil



Weil sie nu vor Gott sich schewet  
Was er vorbent/ von hertzen fleuhet/  
So richt sie sich in gantzer still  
Nach Gottes wort/ vnd Mannes will/  
Thut sich mit willen vor jm bucken  
Kein vngheorsam gegen jm zucken.

### III.

#### Friedlich.

Fried vnd einigkeit ist nicht weit  
Wo demut zur herberg leit/  
Denn bey einander sind sie gern  
Zanckens könnens wol entpern/  
Gehorsam/ wo derselbig wonet  
Dat in Gott zeitlich hie belohnet/  
Das sein Regenten vnd vnterthan  
Die auff Erden genossen han/  
Er hat das Landt mit fried gesegnet  
Allerley wolthat vber sie geregnet/  
Also wo ein Weib vnd Man  
Mit einander guten frieden han/  
Welcher denn daher thut fließen  
Wenn das Weib gehorsam hat bewiesen/  
Damit nimpt sie dem Man das hertz  
Das er sie liebet one schertz/  
Vnd thut auch alles das vormeiden  
Was dem Man nicht steht zu leiden/  
Do haben sie gar sanfftes leben  
Gott wil in auch sein segen geben/

§

Vnd

Vnd sie nicht lassen leiden not  
Behüten auch für schand vnd spot/  
Vnd wenn das haus ist so gethan  
Das man auch Gesindt mus han/  
Da ist sie nicht ruhmorisch  
Gegen Kind vnd gkind nicht sturmisch/  
Thut sie freundtlich vnterweisen  
Sagt/sie sollen nicht wider beißen/  
Kan bisweiln durch dsinger sehen  
Obs nach irn willn nicht ist geschehen/  
Gar wenig zornig wort sie treibet  
Das nur fried im hause bleibet.

V.

Züchtig.

Wenn ein Weib Gottselig bleibet  
Stoltz vnd vngehorsam meidet/  
Einig vnd auch friedlich lebet  
Zucht vnd scham da gern flebet/  
Gantz züchtig vnd ver schampt sie ist  
Flucht schand vnd laster zu aller frist/  
Kein grobes vituerschampts wort  
Wird in kein weg von jr gehort/  
Alles was jr vbel anstehet  
Desselben gern müßig gehet/  
Thut sich des bösen willig enthalten  
In zucht vnd ehr wil sie alten/  
Nichts thut sie/es sey denn ehrlich  
Vor Gott vnd der Welt redlich/

Bey Leuten ist sie nicht vorwegen  
Wie etliche lose Weiber pflegen/  
Die da entblößen ars vnd haupt  
Sie spricht/es sey jr nicht erlaubt/  
Nicht gern ist sie bey solchen bossen  
Ir rede kan sie züchtig moßsen/  
Das gewesch mus nicht sein jr allein  
Leßts bleiben beim ja oder nein/  
Vnd so sie auff die gassen mus gan  
Schawt sie nicht alle zinnen an/  
Steht nicht allweg für wen sie geht  
Sie weis/das Weibern vbel ansteht/  
Ihr sach richtet sie endtlich aus  
Vnd geht denn wider heim zu haus/  
Vnd raumet alles fein zusammen  
Von Töpffen/Schüsseln/Tiegeln vnd pfannē/  
Ists alles fein angeriegen  
Leßts nicht vber eim hauffen liegen/  
Dat sie denn auch der Kindlein klein  
Vnd darff darzu der Windelein/  
Die sind gar rein gewaschen aus  
Nicht schlammig leits in irem haus/  
So feddern aus den betten kriechen  
Thut sies fleißig zusammen süchen/  
Sie hebt sie auff/steckts wider hinein  
Ists zurissen/sie flickt es fein/  
Auff das nicht größser werd das loch  
Vnd geschäch ein größserer schad hernoch/  
Wenn die Kinder ausm bette gehn  
Leßts nicht ein halben tag nacht stehn/

Sie lests auch nicht also zuhaddern/  
 Straubet vmb den kopff herfladdern/  
 Schlicht in das haer/gibt in ein Dembo  
 Desgleich den Knaben sie auch kempt/  
 Vnd hebt da mit in auff jr hendt  
 Das Vater vnser sie in nent/  
 Den Glauben/vnd die Zehen gebot  
 Vnd lehrt sie also dienen Gott/

VI:

Nüchtern.

Ein Weib welche sich nicht hütten kan  
 Vor geringen lastern/vnd fehets an/  
 Da darffes gar wenig erbeit  
 Zumehr lastern ist sie bereit/  
 Dagegen aber ein züchtig Frawen  
 Thut mit rechtem fleis da schawen/  
 Das sie also zu aller zeit  
 Von einer Tugent zur andern schreit/  
 Das koinmet alles dauon her  
 Vnd das sie Gott in seiner lehr/  
 Gefürchtet hat zu aller zeit  
 Das ist der anfang zur Weisheit/  
 Das sie sich nu wol richten kan  
 Nach alle dem/was Gott wil han/  
 Vnd was da jrem Standt gebürt  
 Mit gantem fleis sie das volfür/  
 Diweil sie denn hat scham vnd zucht  
 Bedenckt sie was daraus für frucht/

psal. iii.



Erfolgen sol/dem Kompt sie nach  
 Auff das sie irem Man kein schmach/  
 Zufüge/vnd ihr kein schaden  
 Thut sich mit sauffen nicht beladen/  
 Vnd helt gar feine messigkeit  
 Nüt sich mit fleis vor trunckenheit/  
 Denn sie schendt ein ehrlich Weib  
 Vnd macht vntüchtig iren Leib/  
 Das sie jr schand nicht decken kan  
 Schendt sich damit/vnd iren Man/  
 Denn trunckenheit einem Weibes bildet  
 Gibt vrsach/das sie wird gar wildt/  
 Vnd ires Ampts nicht recht kan pflegen  
 Was man thun sol/bleibt vnterwegen/  
 Sie bleibet derhalb stetig nüchtern  
 Gibt gut Exempel Megden vnd Töchtern/  
 Vnd ergert auch nicht ander Leut  
 Dieweiles Gott hefftig verbent.

Ephes. 5

Matt. 18.

## VII. Keusch.

Ein Weib das nüchtern vnd züchtig bleibet  
 Ander vnart sie gewis nicht treibet/  
 Wie andere/so vnuorschamet sein  
 Sich teglich füllen mit Bier vnd Wein/  
 Da wechst warlich kein gutte frucht  
 Wo nichts/denn trunckenheit wirdt gesucht.  
 All scham ist hin/vnd gar verloren  
 Auch wird vnkeuscheit daraus geboren/

S. iij

Das

Das thut ein ehrlich Weibe nicht  
Dat jr leben auff Keuscheit gericht/  
Kein grobes wort von jr erschalt.  
Wört sies aber/sie erschriekt gar baldt/  
Auch thut sie alles das vormeiden  
Damit die andern vnzucht treiben/  
Oder vrsach darzu mügen geben  
Solches fleucht sie jr gantzes leben/  
Ihr Mann liebt jr/sie helt sich sein  
Auff Erden ist keiner so fein/  
Ein trewer gehülff wil sie jm bleiben  
Dieweil sie hat die Seel im Leibe/  
Sie bsorgt auch/es möcht sie Gott  
Straffen wol mit dem ewigen Todt/  
Sie wil viel lieber haben gnad  
Die Gott den jenigen versprochen hat/  
Welche da leben nach seim willen  
Mit reichem seggen sie erfüllen/  
Solchen Segen hett sie gern  
Helt sich Keusch in worten vnd geberdn/  
Vormeidet alle vmbstende  
Die ein ehrlich Weib schenden/

## VIII.

### Gütig.

Ein Keusch vnd reines Weib von art  
Die sich also in zucht bewart/  
Kein ander Man ihr bas gefelt  
Denn welchem sie ist zugeselt/

Bey

Bey dem bleibt sie in rechter trew  
Ihr beider lieb ist stetigs new/  
Damit thut sie sich ergetzen  
Falsche lieb mag sie nicht letzen/  
Denn andere Menner jung vnd alt  
Sind gegen ihrem vngestalt/  
Vnd ob sie gleich sind jung vnd reich  
Noch sind sie jrem nicht gleich/  
Ihres Mannes leben acht sie hoch  
Vnd ob im etwa leid geschoch/  
Das bringt jr warlich schinertzen  
Mehr denn an jrem eigen hertzen/  
Sie rendt vnd laufft/hat grossen fleis  
Damit sie ire trew beweis/  
Vnd ob er kompt in todes not  
So lidt sie gern vor in den Todt/  
Vnd ob er etwa würd entrüst  
Mit zorn/das ist jr gar kein lüst/  
Sie braucht alda alle vmbstende  
Das sie den vnmuth von im wendt/  
An hülff vnd rath da fehlt es nicht  
Das jrem Man kein leid geschicht/  
Vnd so der Man mus ziehen aus  
Vnd wegreisen von seinem haus/  
Da ist jr leid/bis sie den Man  
Gesund sihet ins hause gan/  
Sie thut nichts vnbedechtig  
Vnd ist im haus vorsichtig/  
Sie verstehet schaden vnd frommen  
Kan allem weislich fürkommen/  
S. iiii Vnd

Vnd ob sie leidet vngemach  
Irem Man befolht sie die sach.

IX.

Getrew.

Ein Weib/welchs der vntrew spilt  
Mit ihrem Man/billich mans schilt/  
Das sie allein ire Potzen  
Wil füllen/das sie strotzen/

Zabacul.  
Job 21.

Ich sag/die sey nicht ehren werth  
Doch lest sie Gott auff dieser Erdt/  
Bleiben/wie ander Gottlos Leut/  
Ein ehrlich Weib sich darnor schewt/  
Sie hat in jr kein solchen mut  
Das sie dem Man stele sein gut/  
Sie weis gar wol/vnd das sie Gott  
Dem Man zum ghillffen geschaffen hat/  
Was jr nu zustehet in dem haus  
Das richtet sie mit trewen aus/  
Im haus thut sie fleis nicht sparen  
Sie sicht dem vieh selber zum baren/  
Das erste auff/das letzte nider  
Ehe es recht tag wirdt/Combt sie wider/  
Das haus vnd auch die Kichen  
Thut sie zu rechter zeit besuchen/  
Vnd hat der Man was geschaffen hinein  
Lest sie den hagel nicht schlagen drein/  
Im Garten fleissig/im haus rüstig  
Ist zu aller erbeit lustig/

Mit



Mit auffraumen / bessern vnd flicken  
Mit nehen / wircken / oder sticken /  
Eest sich nicht müßig finden  
Nimpt ehe ein Rocken / vnd thut spinnen /  
Vnd wie der handel ist gethan  
So hilfft sie trewlich iren Man /  
Auch hat sie sonst ein feste nus  
Wo man etwas verschweigen mus /  
Das mag niemand von jr bringen  
Ist vorschwiegen in allen dingen /  
Ob sie gleich etwas hört sagen  
Thut sie solchs nit austragen.

X.

### Freundtlich.

Salomon in sein Sprüchen schreibet  
Das solcher Man gesegnet bleibet /  
So vberkompt ein solches gut  
Des er sich stets erfreuen thut /  
Das ist ein Weib from vnd getrew  
Die bey jm wohnt on alle schew /  
Dauon er hat freude vnd wonne  
Wie der Nimel der schönen Sonne /  
Vnd die da ist im haus kostfrey  
Gegen dem Gsind / vnd wers sonst sey /  
Vnd thut sich auch gern erbarmen  
Von hertzen vber die Armen /  
Vnd gibet denselbigen gern  
Thut es ehe selber entperen /

G

Vnd

Vnd kan auch wolthun jederman  
Ob sies gleich nicht vordienet han/  
Vor allen dingen helt sie sich  
Gegen jrem Man gar lieblich/  
Vnd richtet all jr thun gar eben  
Dieweil sie bey jm mus leben/  
Das sie also in allen  
Ihrem Mann müge gefallen/  
Sie merckt eben auff seinen mut  
Ob jm etwas misfallen thut/  
Mit fleis thut sie es meiden  
Ob sie gleich bisweiln mus leiden/  
Allein darumb/vnd das an jr  
Der Man kein widerwillen spür/  
Vnd das sie also stetig bliebe  
Gegen dem Man in rechter Liebe/  
Dat es den fug mit glimpffen  
Kan sie mit jm höflich schimpffen/  
Mit Worten vnd geberden  
Ihrs gleichen lebt nicht auff Erden/  
Sie vbertrifft Golt vnd die Perlein  
Silber vnd auch edel gestein/  
Dieser Man ist warlich gesegnet  
Vber welchen diese gab regenet/  
Ein gute starcke seul er hat  
Daran er sich inn seiner not/  
Mag halten/das jm wol gelinget  
Ob in gleich schwere not vmbbringet/  
Er lebet sanfft/wirdt jm nicht sawer  
Vmb sein gut hat er ein mauer/

Prou. 31.

Er bleibet auch in gutem rath  
Dieweil er diejen gehülffen hat/  
Der im erquicket seinen mut  
Er dancke Gott für sollich gut/  
Denn von der Welt hat er sie nicht  
Wie vns denn die Schrift bericht/  
Es hat in irer gewalt die Welt  
Zu geben haus/hoff vnd das feldt/  
Aber ein frommes Ehegemahl  
Kompt herab von Gottes sahl/  
Die wird auch von Gott geleret  
Mit allen Tugenden gezieret/  
Das sie ist Gottselig vnd demütig  
Gehorsam/mildt vnd gütig/  
Barmhertzig/wolthetig vnd friedlich  
Sanfftmutig/bestendig vnd lieblich/  
Verstendig/fürsichtig vnd messig  
Nüchtern/schamhafftig vnd fleissig/  
Züchtig/ehrlich vnd verschwiegen  
Schimpffhafftig/from/ich thue nicht liegen/  
Sie zieret das haus/vnd auch den Mann  
Das er sich ihrer rühmen kan/  
Von ihr haben die Kinder ehr  
Ihr eigen werck loben sie sehr.

### Beschlus.

Wer hie auff Erden leben wil  
Vnd haben warer freunde viel/  
Der findt sie nirgend anderswo  
Denn allein im Ehestandt do/

Er hüt sich aber / das er nicht  
Geb vrsach / wie denn oft geschicht /  
Das in Gott in der Ehe mus plagen  
Was er in seinen jungen tagen /  
Verdienet hat mit seinem leben  
Daruor sol er sich hütten eben /  
Wer aber lebt in Gottes forcht  
Auch sein Göttlichen wort gehorcht /  
Vnd bringet zu seine Jugent  
Jnn zucht / scham / vnd tugent /  
Flenhet laster vnd schnödigkeit  
Vnzucht vnd leichtfertigkeit /  
Gotteslesterung vnd trunckenheit  
Vnd helt sich nach Gottes gerechtigkeit /  
Der wird von Gott anff dieser Erdt  
Einer solchen Hausmutter gewert.

### Das xxvj. Cap. Ihesu Syrach.

Wol dem / der ein tugentsam Weib hat / Des  
lebet er noch eins so lang.

Ein heuslich Weib ist irem Man ein freude /  
vnd macht jm ein fein rüdig leben.

Ein tugentsam Weib ist ein edle gabe / Vnd  
wird dem gegeben / der Gott fürchtet / Er sey  
Reich oder Arm / so ist es jm ein trost / vnd macht  
jm allzeit frölich.

Drey ding sind schrecklich / vnd das vierd ist  
grewlich / Verretherey / Auffrhur / vnschuldig  
Blut vergiessen / welche alle erger sind / denn  
der



der Todt. Das ist aber das hertzeleidt / Wenn  
ein Weib wider das ander euert / vnd schendet  
sie bey jederman.

Wenn einer ein böses Weib hat / so ist es eben /  
als ein vngleich par Ochssen / die neben ander  
ziehen sollen. Wer sie kriegt / der kriegt einen  
Scorpion.

Ein truncken Weib ist ein grosse plage / Den  
sie kan ire schande nicht decken.

Ein härtsch Weib kennet man bey irem vn-  
züchtigen Gesicht / vnd an iren Augen.

Ist deine Tochter nicht schambafftig / so  
halt sie hart / Auff das sie nicht iren mutwillen  
treibe / wenn sie so frey ist.

Wenn du merckest / das sie frech vmb sich si-  
het / so sihe wol drauff. Wo nicht / vnd sie thut  
darüber wider dich / so las dichs nit wandern.  
Wie ein Fusgeiger der durstig ist / lechtzet sie /  
vnd trinckt das nechste wasser / das sie krigt. Dñ  
setzet sich / wo sie einen stock findet / vnd nimpt  
an / was ir werden kan.

Ein freundlich Weib erfrewet iren Mann /  
Vnd wenn sie vernunfftig mit im ymbgehet /  
erfrischt sie im sein hertz.

Ein Weib das schweigen kan / das ist ein ga-  
be Gottes / Ein wolgezogen Weib ist nicht zu  
bezalen.

Es ist nichts liebers auff Erden / denn ein  
züchtig Weib / Vnd ist nichts köstlichers / denn  
ein keusches Weib.


Wie die Sonne/wenn sie auffgangen ist/ in  
dem hohen Dimel des HERN ein zierde ist/  
Also ist ein Tugentsam Weib ein zierde in jrem  
Dause.


Ein schön Weib/das from bleibt/ist wie die  
helle Lampe auff dem heiligen Leuchter.


Ein Weib das ein bestendig gemüt hat / Ist  
wie ein güldene Seulen/auff den Silbernen Stü  
len.

Ende.

Gedruckt zu Leipzig / durch  
Georgium Hanssch.









Österreichische Nationalbibliothek



+Z162580406

